

SÛSĆ

Mans embramides
á slüt sën le vîder.
En cí plën de stères
slaurides y frëides
desco grignes frostîres y stânćes.
Scürité dlaciada dlot vigne som.
Mât en süst zilorëia
tl' aria döra y taionta
y toma spo,
arsësc y se pêrd,
y nîa ne le tën spo plü sö.

Terejia Palfrader

(Val Badia)

ALTONN

Nî scürs y posóc
en dlai de môrt
tal áier döt töme.
Le lërsc s'amatësc
y la resa pica
y smarësc sot la plöia.....

Terejia Palfrader

(Val Badia)

FRONTÜ

Les sîs tan bun dorterades
slüj jö chi trêi cuntra Prades.
Pires de vancëis bel arcunciades
y les rödenes danö endô siades.

Bosc âlc y sorônc
sö sora Planëta y cuntra le Ju
ciadënes co á tegní fora tan d'ônc
mituns co se vëiga al sogü.

Dalunc jö en Graus la Gran Ega
rogor y meja mosciöda le monn.
Mo tlo sonti vign'ôta ch'an vëiga
y âlda dai nêni fostüs y sonn.

Terejia Palfrader

(Val Badia)

